

Johresbricht 2017

GV vom 14. März 2018

Euses Vereinsjohr hei mer met em traditionelle **Gschwelltiobe** am 31. März agfange. 39 Fraue hei sech, jedi mit emene Stück Chäs i der Tasche, im Restaurant Chrüz troffe ond e gmüehtliche Obe gnosse.

För's **Frühligsfest** am 6. Mai hei 18 Fraue e Chueche oder es Dessert gmacht. A dere Stell es hätzlichs Dankeschön!

Am 10. Mai hei mer för „**Schweiz bewegt**“ rond om Turnhalle e Plauschparcour „was Frau so macht“ ufgstellt. Bi herrlichem Wätter on warme Temperature hei die vielsitige Pöste grosse Aklang gfonde.

D'Maiandacht am 12. Mai het eus i d'Santelkapälle of Egerkinge gfühert. Trotz Rägewätter si es paar vo dene 22 Fraue mit em Velo is Nochbersdorf gradlet. I dere hätzige, chline Kapälle hätti kei Nase meh Platz gha ond au churzi Bei si fascht z'lang gse. Aschliessend hei mer bimene feine Dessert im Mövenpick der Obe lo usklinge.

Der **gemeinsami Gottesdienst** het am 21. Juni be eus z'Neuedorf stattgfonde. Es esch immer schön, wenn me nochär no im Panoramasaal bi Kaffi ond Zopf cha zäme gspröchle.

Am 9. August hei mer wäge Schlächtwätter der **Minigolfplausch** müesse absäge. Spontan hei sich es paar Fraue zunere lostige Kaffirondi troffe.

D'Veinsreis am 9. September het eus i d'Roland- Fabrik of Murte gfühert. 43 Fraue hei a der Fühurig teilgno, am Afang bi huufe „Bla-bla-bla“ halt chli meh i d'Apérochörbli glängt, so dass sie z'letscht genau gwösst hei, was sie im Lade no wei chaufe. Nach nochli lädele oder apéröle im schöne Städtli Murte hei mer no es Nachtässe mit Blick ofe See gnosse.

15 Fraue hei sich am 27. Oktober im Panoramasaal zum **Foulardkurs** troffe. Mit Spiegu ond Foulard hei si gspannt of Typs gwartet. Es esch glaub ned eso glunge usecho ond d'Enttüschtig esch bi aune z'gspöre gse.

Am 7. November hei 6 Faue vom Vorstand ond der Untergruppe för 550 Schüeler a de drü Schuelhüser **d'Pausemilch** verteilt. Nachem erfolgrüiche letschte Johr hei mer nome öpe 70 lt Milch brucht, das esch d'höufti vo letscht Johr. Schad, mer hei keini Zuesätz dörfe i d'Milch due.

Der **Gedächtnisgottesdienst** het am 8. November statt gfonde. Mer hei 6 Mitgliederinne gedänkt.

Före jährliche **Räbeliechtliumzug** vom Chindsgi ond der 1. Klass hei am 9. November zwöi vo eus warme Tee vorbereitet ond usgschänkt.

S'Cherzezieh vom 27. November bis am 6. Dezember esch weder einisch meh e glongene Alass gse, wo sehr guet bsuecht esch worde. Be 10 Klasse vo der Primar- ond Oberstufe plus 3x öffentliche hei mer 82 kg Wachs brucht ond 16 Helferinne hei eus zuesätzlich onderestötzt. Hätzliche Dank!

Före **Wiehnachtsmärt** am 1. Dezember of Basel hei sich leider nome grad 12 Fraue agmäldet. Statt mit em Car si mer de mit emene chlinere Busli of Basel gfahre. E wonderbari Stimmig mit Glühewii zum ufwärme, gloschtigi Sache zum chrämerle ond gmüehtliche Beizli zum inesitze het eus erwartet.

Am 13. Dezember hei sich 22 Fraue für **d'Adventsfiir** i der Chile troffe ond si aschliessend för es Chlauseznacht is Panoramasaäli.

Im Dezember hei mer weder einisch meh 24 wunderschöni **Adventsfeister** dörfe bestune. Allne Mitwirkende es hätzlichs Dankeschön! E Liste för das Johr wird no i Umlauf gäh.

Der **Racletteplausch** am 19. Januar i der Vogelschutzhütte esch eigentlich echli anderst planet gse. S'Wätter het eus mit heftige Störm ond starkem Räge e Strich durch d'Rechnig gmacht. Es het sich aber doch no zum Guete gwändet ond 19 Fraue hei e gmüehtliche ond warme Obe i der Waldhütte verbrocht.

Der **Wältgebetstag** het am 2. März z'Egerkinge stattgfonde. Das Johr escher vo Fraue us Surinam vorbereitet worde.

Wie jedes Johr, hei sich einisch im Monat d'Fraue zur **Jass-, Spiel- ond Jockerrundi** troffe.

Neu is Läbe grüeft het sich **d'Strickgruppe**. Sit em 5. Oktober träffe sich immer ca. 7-9 Fraue 2x pro Monat im Panoramasaal zum a ihrere „Lismete“ witerzmache. Wär loscht het, näbem lisme nochli z'plaudere, esch gärn iglade.

Im Johr 2017 hei mer vom Vorstand 3x zum 70. , 1x zum 75. , 3x zum 80. , 5x zum 85. , 4x zum 90. ond 1x zum 95. **Geburtstag** dörfe go gratuliere.

Au a **Nachwuchs** hets ned gmanglet. Am 2. Juni esch Tina, Tochter vo der Lämmle Marianne of d'Wält cho. Am 25. September der Raphael, der Sohn vo der Studer Sabina, am 29. Oktober der Diego, der Sohn vo der Flury Nicole, am 8. November der Levi, der Sohn vo der Brönnimann Denise ond vor zwöi Woche, am 1.März d'Jael, Tochter vo der Ammann Ramona. Mer gratuliere nomol ganz hätzlich!

Mer vom Vorstand hei sich zu 6 **Sitzige** troffe.

A der Stell möcht e me ganz hätzlich bi mine Vorstandsfraue för die gueti Zämearbeit bedanke, au wens mängisch e chli riebereeie gä het. Aber e danke, wo gschaffet wird, gits au immer Hörde, wo müesse bezwonge werde. Es esch es guet Johr gse ond ofs nächste beni gspannt, was es eso bringt.

Au e hürzliche Dank recht e a d'Fraue vo der Undergruppe ond der Bea Emmenegger före Isatz ond d'Onderstützig.

Euch allne, liebi Fraue, danke mer förs Vertraue, dass der eusi Aläss bsuechet ond so s'Intresse a eusem Verein zeigtet.